

Sarajevo, 6. 5. 2024. godine
Broj: 09 – 09-3 – 491-10/23

Poziv studentima III ciklusa studija i mladim istraživačima na *Treće susrete mladih istraživača Bosne i Hercegovine iz oblasti prirodnih, tehničkih, matematičkih i medicinskih nauka i inženjeringa (STEMM)*

Poštovane kolegice i kolege, studenti III ciklusa studija i mladi istraživači,

Zadovoljstvo nam je pozvati vas na dvodnevni skup *Treći susreti mladih istraživača Bosne i Hercegovine iz oblasti prirodnih, tehničkih, matematičkih i medicinskih nauka i inženjeringa (STEMM)*, koji će u organizaciji Akademije nauka i umjetnosti Bosne biti održan 25. i 26. 10. 2024. godine.

Polazeći od široko prihvaćene uloge studenata doktorskog studija i mladih istraživača u razvoju nauke i tehnologije, želja nam je da uspostavimo institucionalni okvir koji će omogućiti godišnje susrete mladih istraživača u oblasti prirodnih, tehničkih i matematičkih nauka i inženjeringa, a od ove godine i medicinskih nauka (STEMM). Osnovni cilj ovih susreta je formiranje platforme za razmjenu mišljenja o istraživanjima koja realizuju mladi istraživači, stanju i uslovima obrazovanja studenata III ciklusa studija, procjena mogućnosti saradnje, uspostavljanje uslova koji će omogućiti postizanje značajnih naučnih rezultata i ubrzanje istraživačkih procesa na visokoškolskim ustanovama i istraživačkim institucijama u Bosni i Hercegovini. Poseban aspekt susreta je uspostavljanje kontakata s mladim istraživačima porijeklom iz Bosne i Hercegovine koji djeluju u ovim oblastima na univerzitetima i istraživačkim institucijama u svijetu.

Učesnici skupa: studenti doktorskih studija u STEMM oblastima koji su položili sve ispite i imaju prihvaćenu istraživačku temu, mladi istraživači koji su doktorirali u posljednjih 5 godina, članovi Akademije nauka i umjetnosti Bosne i Hercegovine, nastavno osoblje i uspješni istraživači s domaćih univerziteta, istraživači porijeklom iz Bosne i Hercegovine koji djeluju u inostranstvu i predstavnici bh. privrede.

Format skupa: studenti III ciklusa studija i istraživači će usmeno predstaviti svoje istraživanje u trajanju od 5 minuta u formi PP prezentacije na maksimalno 5 slajdova.

Uvjeti za prijavu: pravo na prijavu imaju studenti III ciklusa studija iz STEMM oblasti, koji imaju položene sve ispite i definisan program istraživanja i istraživači koji su odbranili doktorski rad u posljednjih 5 godina i nisu stariji od 35 godina.

Prijava: studenti III ciklusa i istraživači koji žele učestvovati na skupu i prezentirati svoj rad trebaju popuniti priloženi obrazac i poslati ga organizatoru skupa najkasnije **do 30. 6. 2024. godine** na adresu akademija@anubih.ba.

Nagrada: Naučni odbor skupa dodijelit će tri novčane nagrade za najbolju prezentaciju istraživanja. Prva nagrada će iznositi 2.000,00 KM, druga nagrada 1.500,00 KM i treća nagrada 1.000,00 KM.

Vrijeme i mjesto održavanja skupa: 25. i 26. oktobar 2024. godine, Akademija nauka i umjetnosti Bosne i Hercegovine (Bistrik 7, Sarajevo).

Troškovi smještaja: učesnicima sa univerziteta u Banjoj Luci, Bihaću, Mostaru, Tuzli i Zenici, **čije prijave budu prihvaćene**, organizator će platiti troškove dva noćenja u hotelu. Obavijest o prihvatanju prijave istraživanja bit će dostavljena do kraja jula 2024. godine.


Troškove putovanja pokrivaju učesnici skupa.

Drugog dana skupa (26. 10. 2024. godine) bit će održan okrugli sto na temu *Stvaranje uslova za povratak mladih, obrazovanih kadrova i doktora nauka u Bosnu i Hercegovinu*. Cilj okruglog stola jeste pokretanje diskusije o povezivanju i aktivnoj saradnji akademskih institucija i industrije sa stručnjacima u Bosni i Hercegovini i inostranstvu, te predlaganje mjera za stvaranje uslova u Bosni i Hercegovini koji će motivisati mlade obrazovane kadrove iz Bosne i Hercegovine da se vrate u zemlju i doprinesu razvoju i prosperitetu Bosne i Hercegovine. Preliminarni program okruglog stola dostavljamo u prilogu.

Za sve dodatne informacije stojimo vam na raspolaganju putem sljedećih kontakata: akademija@anubih.ba i 033 559 495.

Pravo prijave na skupu imaju također studenti i istraživači koji su učestvovali na prethodnim skupovima održanim u februaru i novembru 2023. godine.

Pozivamo vas da se prijavite na skup i molimo da poziv prosljedite zainteresiranim kolegama i kolegicama koji ispunjavaju uvjete za prijavu i učešće na skupu.


Za Naučni odbor skupa,
akademik Asif Šabanović